

MEMORANDUM O SARADNJI I RAZUMIJEVANJU

IZMEĐU

UNIVERZITETA U SARAJEVU - FAKULTETA POLITIČKIH NAUKA

I

J.P. MEĐUNARODNI AERODROM "SARAJEVO" D.O.O. SARAJEVO

MAJ 2025. GODINE

Polazeći od uvjerenja da saradnja visokoobrazovnih institucija i privrednih društava u Bosni i Hercegovini može dovesti do sinergije njihovih potencijala i rezultirati kvalitetnim aktivnostima od koristi u oblasti zapošljavanja, individualnog i profesionalnog razvoja, obrazovno profiliranih, nadarenih i inovativnih mladih žena, muškaraca i drugih, koji žele postati predvodnicima privrednog, ekonomskog, društvenog i socijalnog razvoja cjelokupne zajednice;

Poštivajući obostrana znanja, kadrovske kapacitete, društvene doprinose i benefite respektabilne fakultetske institucije i uspješnog javnog preduzeća, u obostranoj želji otvaranja svih kapaciteta za sve koji se žele dokazati znanjem, radom i pozitivnim ljudskim karakteristikama u kolektivu, bez obzira na njihovu rasu, boju kože, jezik, vjeru, etničku pripadnost, invaliditet, spol, seksualnu orijentaciju, starosnu dob, socijalno porijeklo, imovno stanje i veze sa nacionalnim manjinama, političkim opredjeljenjima, članstvom u sindikatu, drugom udruženju i društvenom položaju;

U namjeri da studentkinje i studenti na studentskoj praksi, univerzitetski profesori i instruktori/predavači sa Međunarodnog aerodroma Sarajevo, u obostranoj razmjeni stečenog znanja, profesionalnog iskustva, tehničko-tehnoloških metoda u obrazovanju i radu, obuci na sredstvima za rad, međusobnom razmjenom proizvedu i odaberu najkvalitetnije kadrove za budući profesionalni angažman u najuspješnijim privrednim društvima uzimajući u obzir promjenu potreba za vještinama i iskustvima u obrazovanju žena i djevojaka;

I imajući u vidu sve veći odlazak visokoobrazovanog kadra van granica naše zemlje, zbog kojeg Bosna i Hercegovina prati negativni regionalni trend iseljavanja, kojem se potrebno suprotstaviti alternativom, i pokazati da naša zemlja, kooperacijom znanja i rada, može pružiti sigurnost i mogućnosti za prosperitetan život, rad, karijeru i napredovanje u naučnom, profesionalnom i ličnom životu, Univerzitet u Sarajevu - Fakultet političkih nauka i J.P. Međunarodni aerodrom "SARAJEVO" d.o.o. Sarajevo saglasni su o slijedećem:

Svrha Memoranduma

Univerzitet u Sarajevu - Fakultet političkih nauka i J.P. Međunarodni aerodrom "SARAJEVO" d.o.o. Sarajevo (u daljnjem tekstu: Potpisnici) ovim putem, na način i pod uvjetima predviđenim u Memorandumu, uspostavljaju edukativnu, poslovnu, tehničko-tehnološku saradnju u cilju podrške u obrazovnom i iskustvenom usavršavanju studenata/kinja, nastavnog i stručnog osoblja Fakulteta političkih nauka, te radnika i rukovodilaca Međunarodnog aerodroma Sarajevo.

Predmetna saradnja u skladu je sa mandatima Potpisnika, koji su prepoznati kao nosioci aktivnosti iz oblasti upravljanja kvalitetom, implementacije i održavanja standarda/modela/alata upravljačkih sistema, te uspostavljanja potrebnih okvira za održivo i transparentno uvođenje koncepata i principa Europske Unije.

Potpisnici Memoranduma su saglasni da saradnju razvijaju na ravnopravnim osnovama, uz maksimalnu zaštitu profesionalnih, moralnih i materijalnih interesa drugog potpisnika Memoranduma.

Potpisnici Memoranduma se obavezuju da u provođenju saradnje:

- Djeluju planski i organizovano;
- Izražavaju međusobno poštovanje i rade na pozitivnom promovisanju saradnje;
- Sve povjerljive informacije do kojih dođu čuvaju kao poslovnu tajnu;
- Minimum jednom godišnje vrše analizu saradnje i donose preporuke i mjere za unapređenje iste.

Memorandumom Potpisnici iskazuju opredijeljenost da će akademskim građanima i građankama (studenticama i studentima, nastavnom i stručnom osoblju, radnicima i radnicama Međunarodnog aerodroma Sarajevo, te ostalim zainteresiranim licima), dati obostranu podršku u omogućavanju jednakih i kvalitetnih uvjeta za upoznavanje sa radnim i edukativnim procesima u J.P. Međunarodni aerodrom „SARAJEVO“ d.o.o. Sarajevo i Fakulteta političkih nauka, uz unaprijed utvrđena prava i obaveze:

a) Fakultet političkih nauka

- promoviše rad Fakulteta u domenu Odjeka Sigurnosne i mirovne studije kao organizacione jedinice visokoškolske institucije kako zaposlenim u J.P. Međunarodni aerodrom „SARAJEVO“ d.o.o. Sarajevo, tako i svim drugim zainteresiranim stranama na sarajevskom aerodromu.
- omogućava instruktorima i stručnim licima iz J.P. Međunarodni aerodrom „SARAJEVO“ d.o.o. Sarajevo, da apsolvencima i apsolventicama, nastavnom i stručnom osoblju fakulteta, održe prezentacije i stručna predavanja iz oblasti međunarodnog civilnog zrakoplovstva, sigurnosnih mjera kontradiverzione zaštite, pregleda osoba, prtljaga, cargo tereta, vozila, zrakoplova i drugih radnih procesa aerodromskog operatora;
- osigurava, u saradnji sa Potpisnikom memoranduma, bezuvjetnu razmjenu naučnih saznanja i istraživanja, predavanja, publikacije, seminare i obuke, o inovacijama, aktuelnim temama i

događajima iz svijeta svih oblika sigurnosnih politika, procedura, mjera i drugih sigurnosnih djelatnosti koje su vezane za zračni saobraćaj i međunarodne aerodrome;

- inicira zajedničko učešće i prisustvo Potpisnika na naučnim predavanjima, seminarima, konferencijama i drugim skupovima čija je tema sigurnost u zrakoplovstvu i zrakoplovnom saobraćaj;
- upućuje na obavljanje praktične nastave/studentsku praksu po mogućnosti podjednak broj studenata i studentkinja završne godine Prvog ciklusa studija Odsjeka Sigurnosne i mirovne studije, koje u određenom periodu mogu primiti organizacione jedinice u J.P. Međunarodni aerodrom „SARAJEVO“ d.o.o. Sarajevo;
- prema potrebi i na zahtjev J.P. Međunarodni aerodrom „SARAJEVO“ d.o.o. Sarajevo pruža informacije o realizaciji nastavnog programa, broju studenata i trendovima vezanim za spolnu zastupljenost upisanih i svršenih studenata smjera.

b) J.P. Međunarodni aerodrom „SARAJEVO“ d.o.o. Sarajevo

- u skladu sa raspoloživim resursima, omogućiti stručnu i drugu vrstu pomoći Fakultetu političkih nauka Univerziteta u Sarajevu, da ostvari ciljeve u oblasti obrazovanja svojih studenata i obrazovnog kadra;
- osigurava resurse (materijalne, prostorne i stručnokadrovske) za izvođenje predavanja, seminara, radionica i/ili studentske prakse za studentice i studente završne godine na Odsjeku Sigurnosne i mirovne studije, te posredstvom dodijeljenih mentora daje mišljenje i ocjenjuje studente u skladu sa pripremljenim protokolima;
- inicira zajedničko učešće i prisustvo Potpisnika na naučnim predavanjima, seminarima, konferencijama i drugim skupovima čija je tema zrakoplovstvo i zrakoplovni saobraćaj;
- osigurava, u saradnji sa Potpisnikom memoranduma, bezuvjetnu razmjenu naučnih saznanja i istraživanja, predavanja, publikacija, seminara i obuka o inovacijama, aktuelnim temama i događajima iz svijeta zrakoplovstva i drugih uslužnih djelatnosti koje su neposredno vezane za zračni saobraćaj, a prioritetno o:
 - politici sigurnosti civilnog zrakoplovstva – Aviation/Airport Security;
 - poznavanju pravnog okvira u području sigurnosti civilnog zrakoplovstva uključujući pravne propise BiH kao i propise najznačajnijih organizacija koje uređuju oblasti sigurnosti na međunarodnom planu-nivou (ICAO/ECAC/EC/IATA);
 - znanjima o ranijim djelima nezakonitog ometanja u području civilnog zrakoplovstva, terorističkim djelima i trenutnim prijetnjama;

- poznavanja ciljeva i organizacije sigurnosti civilnog zrakoplovstva, uključujući obaveze i odgovornosti lica koje provode sigurnosne kontrole (SOP za sve vidove i aktivnosti iz domena sigurnosti i kontrola lica, prtljaga poznavanje postupaka kontrole pristupa (poznavanje sistema identifikacijskih kartica za pristup zonama ograničenog pristupa u upotrebi, poznavanje postupaka provjeravanja lica i okolnosti u kojima se lica moraju provjeriti ili prijaviti, poznavanje postupaka prijavljivanja);
 - sposobnosti identificiranja zabranjenih predmeta i sposobnost primjerenog reagiranja na incidente povezane sa sigurnošću;
 - znanju o tome kako ljudsko ponašanje, reakcije i komunikacija mogu uticati na učinak u području sigurnosti;
 - poznavanju elemenata koji doprinose uspostavljanju čvrste i otporne kulture sigurnosti na radnom mjestu i u području zrakoplovstva uključujući, između ostalog, unutrašnje prijetnje i radikalizaciju, prezentacija Programa sigurnosti aerodroma i njegovih priloga (SOP/Interna kontrola/ osposobljavanje)
 - kriznom komuniciranju (usljed različitih potencijalnih prijetnji i/ili akata nezakonitog ometanja).
- organizira posjete obrazovnog kadra, studenata, partnera i gostiju Fakulteta političkih nauka Sarajevskom aerodromu, u cilju prezentacije planova rada, organizacije i ljudskih resursa preduzeća, u svrhu upoznavanja i povećanja interesa šire društvene zajednice za stručno osposobljavanje u oblasti sigurnosti na međunarodnim aerodromima, te drugim poslovima aerodromskog operatora;
- preuzima obavezu da obezbjedi stručna lica koja će svojim iskustvom doprinjeti mijenjanju stereotipa vezanih za „muška i ženska zanimanja“ kao i povećanju praktičnih znanja i vještina neophodnih za studente i buduće stručnjake u sferi sigurnosti na međunarodnim aerodromima i ukupnoj aerodromskoj djelatnosti.

Prelazne i završne odredbe

Ovaj Memorandum se zaključuje u duhu partnerstva i međusobnog povjerenja.

Svaka potpisnica može raskinuti ovaj Memorandum uz pisano obavještenje druge potpisnice i isteka 30 dana od dana dostavljanja obavještenja o raskidu Memoranduma.

Eventualne sporove u pogledu tumačenja i implementacije Memoranduma, strane potpisnice će rješavati u duhu dobre volje i uzajamnog poštovanja.

Potpisnici se obavezuju da će sve povjerljive podatke koje im druga strana bude dostavila, stavila na uvid ili prepustila na korištenje, čuvati najmanje s istim stepenom pažnje sa kakvim čuva sopstvene povjerljive podatke istog stepena povjerljivosti, te istima ograničiti pristup vodeći se principom „need to know basis“.

Bilo koja intelektualna svojina, nastala kao rezultat saradnje Potpisnika memoranduma, suvlasništvo je u jednakim dijelovima Fakulteta političkih nauka Univerziteta u Sarajevu i J.P. Međunarodni aerodrom „SARAJEVO“ d.o.o. Sarajevo.

Ovaj Memorandum se zaključuje na neodređeno vrijeme i može se mijenjati i dopunjavati na zahtjev svake potpisnice, uz saglasnost druge potpisnice, zaključenjem Aneksa. Memorandum je sačinjen na jednom od službenih jezika Bosne i Hercegovine (bosanskom) po dva identična primjerka potpisana u originalu, od kojih svaki potpisnik zadržava po 2 (dva) primjerka.

br: 00-02-2-7298-2/25

50-2-0054-1/25

U Sarajevu, dana 14.05. 2025. godine

J.P. Međunarodni aerodrom „SARAJEVO“
d.o.o. Sarajevo

Univerzitet u Sarajevu- Fakultet političkih
nauka

V.D. DIREKTOR /

